



Broj: 01-180/15
Vareš, 30.11. 2015. godine

Na osnovu člana 22. Statuta Općine Vareš – Prečišćeni tekst, broj: 01- 162/12 od 11.09. 2012. godine, i na osnovu člana 2. stav 2 i člana 32 stav 2. Zakona o pravobranilaštvu („Službene novine Zeničko – dobojskog kantona“, broj: 12/13), te ukazane potrebe, Općinsko vijeće Vareš na 31. redovnoj sjednici održanoj 30.11.2015. godine, d o n o s i:

O D L U K U

o osnivanju općinskog pravobranilaštva Općine Vareš

Član 1.

Općinsko vijeće Vareš osniva Općinsko pravobranilaštvo Općine Vareš kao poseban i samostalan organ koji svoju funkciju vrši u skladu s Ustavom, a na osnovu zakona, drugih propisa i općih akata, koje preduzima mjere i pravna sredstva radi pravne zaštite imovine i imovinskih interesa Općine Vareš.

Općinski pravobranilac je zakonski zastupnik općine koji preduzima pravna sredstva i mjere radi pravne zaštite imovine i imovinskih interesa općine.

Član 2.

Sjedište Općinskog pravobranilaštva Općine Vareš je u Varešu, ulica Zvijezda, br 34.

Član 3.

Općinsko pravobranilaštvo ima pečat.

Pečat je okruglog oblika, prečnika 50 mm s tekстом sljedećeg sadržaja:

Bosna i Hercegovina, Federacija Bosne i Hercegovine, Zeničko – Dobojski kanton,
Općinsko pravobranilaštvo Vareš.

Član 4.

Općinsko pravobranilaštvo obavlja poslove pravne zaštite imovine i imovinskih interesa općine i njenih organa i tijela koja nemaju svojstvo pravne osobe, a finansiraju se iz budžeta općine.

Po zahtjevu mjesne zajednice, pravobranilaštvo će se u ime općine umiješati u određeni imovinsko - pravni spor na strani mjesne zajednice.

Općinsko pravobranilaštvo ne zastupa organe i tijela općine u radnim sporovima, izuzev radnih sporova pokrenutih radi novčanih potraživanja.

Član 5.

U poslovima zastupanja pravobranilaštvo kao zakonski zastupnik općine preduzima pravne radnje i pravna sredstva radi zaštite imovine i imovinskih interesa općine pred sudovima i drugim nadležnim organima, kao i drugim slučajevima zaštite imovine i imovinskih interesa općine kada je na to ovlašteno zakonom.

Organi i tijela navedeni u članu 10. Zakona o pravobranilaštvu dužni su blagovremeno obavijestiti pravobranilaštvo o slučajevima u kojima ih je ono ovlašteno zastupati i ulagati pravna sredstva i preduzeti druge zakonom određene pravne radnje, te mu dostaviti svu potrebnu dokumentaciju.

Član 6.

Pravobranilaštvo pruža stručnu pomoć organima i pravnim licima navedenim u članu 3. Zakona o pravobranilaštvu u rješavanju imovinsko – pravnih pitanja.

Član 7.

Sredstva za rad općinskog pravobranilaštva Općine Vareš osigurat će se u budžetu Općine Vareš.

Član 8.

Funkciju općinskog pravobranilaštva vrši jedan općinski pravobranilac ili njegov zamjenik.

Općinsko pravobranilaštvo će imati jednog zamjenika.

Odluku o imenovanju pravobranilaca i/ili zamjenika donijet će općinsko vijeće u skladu sa odredbama Zakona i prema ukazanoj potrebi.

Član 9.

Propisi kojima se uređuje radno – pravni status državnih službenika i namještenika u organima državne službe, u skladu se primjenjuju i na državne službenike i namještenike u općinskom pravobranilaštvu, ako Zakonom o pravobranilaštvu nije drugačije određeno.

Član 10.

Ovom odlukom stavlja se van snage Odluka o osnivanju Zajedničkog općinskog pravobranilaštva općina Vareš i Olovo broj: 01-26/13 od 29.01. 2013. godine i broj: 01-63/13 od 28. 02. 2013. godine.

Član 11.

Općinsko pravobranilaštvo počinje sa radom 01.01.2016. godine.

Član 12.

Ova odluka stupa na snagu osmog dana od dana objavljivanja na oglasnoj tabli Općine Vareš.

**PREDSJEDAVAJUĆI
OPĆINSKOG VIJEĆA**

Zdravko Marošević

Odluka je objavljena na oglasnoj tabli Općine Vareš, dana 01.12. 2015. godine.

OPĆINSKI NAČELNIK

Kovačević Avdija, dipl. pravnik

O b r a z l o ž e n j e
Odluke o osnivanju Općinskog pravobranilaštva Općine Vareš

1. Pravni osnov

Pravni osnov za donošenje ove odluke sadržan je u članu 2, stav 2, i u članu 32. stav 2. Zakona o pravobranilaštvu („Službene novine Zeničko – dobojskog kantona“, broj: 12/13) kao i u članu 22. Statuta Općine Vareš - Prečišćeni tekst, broj: 01- 162/12 od 11.09. 2012. godine.

2. Razlozi za donošenje odluke

Općinsko vijeće Olovo donijelo je Odluku o osnivanju općinskog pravobranilaštva općine Olovo br: 01-01-3-2304/15 od 30.09.2015. godine, te samim tim stavilo je van snage Odluku o osnivanju zajedničkog općinskog pravobranilaštva općina Vareš i Olovo, broj: 01-01-3-198/13 od 29.01.2013. godine što ukazuje na potrebu za osnivanjem Općinskog pravobranilaštva Općine Vareš, kao organa zaštite imovine i imovinskih interesa Općine Vareš.

3. Finansijska sredstva:

Za sprovođenje ove odluke potrebna su finansijska sredstva koja će biti planirana u budžetu općine Vareš.

OPĆINSKI NAČELNIK

Kovačević Avdija, dipl. pravnik